

Seizcou daengz lo, dahsau seizcou yaengyaeng byaij daeuj lo.

De byaij haeuj ndaw ndoengfaex, soengq geu buhlongz henj he hawj daxgoeng goyangz. Daxgoeng goyangz daenj hwnj geu buhlongz henj neix, sikhaek bienqndaej daegbied cingsaenz. De riuho ho doiq dahsau seizcou naeuz: "Dahsau cou, docih mwngz!"

Go' nywj youq goekfaex goyangz haenx yawjraen le, de doiq dahsau seizcou naeuz. "Dahcej cou, mwngz soengq geu buhlongh henj he hawj gou ndaej lwi?"

Dahsau seizcou riu dwk naeuz: "Ndei ha! Ndei ha!"

Yienghneix, dahsau seizcou hix soengq geu buhlongz henj he hawj go-nywj.

Lwngyez rumzcou diuqbeiz haenx gaenjaenj riengz youq baihlaeng dahsau seizcou, angq dwk buetlili. De yawjraen daxgoeng goyangz caeuj dahnuengx go'nywj cungj longz hwnj buhlongz henj, angq dwk hemq hwnjdaej: "Ya! Gyaundeix raixcaix!"

De humx daxgoeng goyangz cienq bae cienq dauq, baenzlawz cungj yawj

mbouj gaeuq.

Lwngyez rumzcou daeujdaengz baihnaj daxgoeng goyangz, byaengq aenda iq de, bungj daxgoeng goyangz naeuz: "Daxgoeng goyangz, ciq buhlongz henj mwngz hawj gou daenj mbat he ba!"

Daxgoeng goyangz riuwhw yawj dwk lwngyez rumzcou, mbouj han de.

Lwngyez rumzcou gip lo, de bongq aenbak yungh rengz boq rumz, gig vaiq couh aeu geu buhlongz henj daxgoeng goyangz ciengj gvaqdaej lo. De angqvauvau itmienh sawq daenj buhlongz henj, itmienh diuq foux de gag bien haenx.

Hoeng, buhlongz henj daiq hung lo, lwngyez rumzcou saetmuengh dwk naeuz: "Geu buhlongz henj baenzneix

ndei yawj, hojsik gou daenj daiq hung lo....." Lwngyez rumzcou itmienh nambyodbyod, itmienh doiq daxgoeng goyangz naeuz: "Boiz hawj mwngz!" Gangj dwk, geu buhlongz henj couh vut youq gwnzdieg. Lwngyez rumzcou cix siuqrumz buet deuz lo.

Dahnuengx go' nywj yawj mbouj gvaq da, nai daxgoeng goyangz naeuz: "Daxgoeng goyangz, mwngz gaej hozndat bw, lwngyez rumzcou cij dwg miz di diuqbeiz....."

Daxgoeng goyangz doiq go' nywj naeuz: "Mbouj youqgaenj law, couhcinj lwngyez rumzcou mbouj duet geu buhlongz henj bae, gvaq duenh seizgan he, gou hix dawz geu buhlongz henj duet bae."

"Vih gijmaz ne?" Go' nywj



ngeizvaeg dwk cam.

Daxgoeng goyangz naeuz: "Danghnaeuz mbouj duet geu buhlongz bae, seizdoeng daengz le, raemx gwnz ndang dou couh saet bae haujlai, doiq ndangdaej mbouj ndei ha!"

Go' nywj dingq gij vah daxgoeng goyangz le, riu naeuz: "Laxlawz dwg yienghneix ha, baenzneix gou couh cuengqsim lo."

Daxgoeng goyangz riu lo, go' nywj hix riu lo. Youq ndawdoengh, gij sing riu gyoengqde cienz ndaej gig gyaeg gig gyaeg.

(Liuz Genvaz)




Seizcou Daeuj Lo

秋天来了

Byaijhaeuj ndaw ndoengfaex iq bae, byaij youq gwnz diuz loh caemdingh he, youq gizgyae, lumj baenz dah baenz dah dahsau gyaeg lengj vuenh hwnj buhhenjrog gyaundeix nei. Mwngz yawj, raemxrij ndaw ndoeng lij dwg baenzhaenx nyaengq, dinghdingh lae bae coh giz gyaeg. Byaij haeuj gyawj yawj, raemxrij sawndik yawjraen daejrij, lumj vih gou bwh ndei aen gingq he. Mwh seizhah mbwn ndat, gou byaij daengz henz rij, aeu raemxrij daeuj swiq aennaj okhanh, ha! Caen liengz caen cwxcaih ha. Siengj dwk siengj dwk, gou couh aeu fwngz bae gop raemx, ya, raemx bienq gyoet lo. Gou sawqmwh hawj naeuz: "Seizcou caen dwg daeuj lo."

Gyoengq bya he youz gvaqdaej, najraemx sanq ok baenz gvaengx baenz gvaengx fubfed. Daxmeh duzbit hix daiq gyoengq bitlwg he daeuj couqnauhyied, najraemx bingzdingh haenx nauhyied hwnjdaej lo! Dwg bw, seizcou caen dwg daeujdaengz lo.

(seiq nienzgaep Fungz Shwvwnz)



Roegreuq ranz mehgu x gwn doxgaiq gig mizyinx, gou gueng haeux hawj de gwn, yienzbonj laihaeuz de sikhaek gwnngabngab, mbouj siengj daengz de doengh hix mbouj doengh. Mehgu x ronq gep makbingzgoj he cuengq haeuj ndaw roengz bae, roeggeuq sikhaek diuq roengzdaej dot haeux gwn. Caen dwgcaengz, vihmaz gou gueng de de mbouj gwn, mehgu x gueng de couh gwn! Mehgu x raen gou mbouj angq, couh naeuz: "Duz roeggeuq neix caeuj vunzraeuz ityiengh, danghnaeuz mbouj miz byaek, dan gwn haeux mwngz gwn mbouj gwn ndaej roengz ne? Roeggeuq hix ityiengh." Dingq coenz vah mehgu x neix, gou couh mbouj caiq mbouj angq lo. Baez siengjsiengj, duz roeggeuq neix lij caen dwggyaez bw!

(seiq nienzgaep Vuz Haijyinz)

Daxdaiq Gou

我的外婆



Mwh iq gou caeuj daxdaiq fwngz gaem fwngz doxcaez byaij, gou roxnyinh daxdaiq dwg baenzhaenx sang. Seizneix, daxdaiq laenggoz lo, gou caeuj daxdaiq ityiengh sang lo.

Mwh iq gou caeuj daxdaiq fwngz gaem fwngz doxcaez byaij,

fajfwngz daxdaiq ndaej aeu gaiqfwngz gou cienzbouh bau dawz, fwngz hung gaem fwngz iq, gaiqfwngz daxdaiq geijlai unqnem ha. Seizneix, fajfwngz gou caeuj fajfwngz daxdaiq ityiengh hung lo, gaiqfwngz daxdaiq hix bienq ndaej lumj gaiq faexroz ityiengh. Lwgfwnzcod daxdaiq seizneix gaeng doengh mbouj ndaej lo. Mehfwngz caeuj lwgfwnzcaemj hix vangoz bienqyiengh, moix baez gaem gaiqfwngz daxdaiq, gou cungj roxnyinh genggaeng cocat.

Gou bae hagdangz le, daxdaiq buenx gou hwnjhag, cuengqhag. Geiq ndaej miz baez coumued he, daxdaiq buenx gou bae hwnj goqmeijsuz, roengzdangz le, gou lumj bingzseiz ityiengh lumj duzmax buet nei buet bae coh gunghgung hei qci, gizaed gou yienghneix guh couhdwg siengj ciengj song aen dieгнаengh. Boux daxheiz he umj lwngyez hwnj ci le, gij vunz naengh gwn dieгнаengh haenx lumj yawj mbouj raen nei mbouj yawj saek mbat, daxdaiq yawjraen le, sikhaek aeu aen dieгнаengh gou mbouj

yungzheih ciengj daengz haenx nyiengh hawj daxheiz naengh. Gou fatheiq dwk doiq daxdaiq naeuz: "Mwngz dwg vunzlaux lij nyiengh dieгнаengh ha?" Hoeng daxdaiq cix riu dwk doiq gou naeuz: "Mwh naengz bang couh bang mbat he." Gou caeuj daxdaiq naengh gunghgung hei qci ciengzseiz fatseng gij saeh nyiengh dieгнаengh, seizgan nanz le, gou hix cawjdoengh nyiengh dieгнаengh lo.

Daxdaiq lij dwg boux "cienmonz" cawj haeuxbyaek hawj gou ne, gou moix ngoenz cungj ndaej gwn daengz gak cungj byaek ndeigwn. Miz duenh seizgan he goengda baenzbingh, daxdaiq bae ciuqgoq goengda, mbouj miz seizgan cawj gij ndeigwn hawj gou gwn, gou moix ngoenz gwn gij haeuxbyaek daxmeh cawj hawj gou haenx, gou cungj roxnyinh daengz mbouj lumj daxdaiq cawj ndaej ndei gwn. Gou gwn ndaej gig noix, daxmeh aenvih yienghneix fatheiq ne.

Neix couhdwg daxdaiq gou, boux vunz buenx gou majhung he.

(haj nienzgaep Sij Yinzgingh)

